

Apünüintuaitkat Karaloukta nütüma

JUAN

¹Taya, chi laülaakai napüleerua na anoujashiikana nünaïn Jesucristo sulu'u tü outkajaaleekat yaaya, tashajüïn joolu'u pümüïn tawala Gayo, pia aishikai tapüla saa'u pünoujain tü shiimüinkat wanaa tamaa. ²Tawalachee, tatüjaa aa'ulu sünaïn talatüïn Maleiwa pümaa. Kasataalejese ayatüïn lotüïn pia sünaïn anoujaa otta sünaïn nnojolin ayuulin pia. ³Talatüsü ma'i taa'in taapaiwa'aya püchiki aküjünakat tamüïn natüma wane wawalayuu ale'ejakana yaamüïn chajee püma'anajee. Naküjain püchiki tamüïn sünaïn pünoujain tü shiimüinkat waneepia otta sünaïn paa'inrüïn tü nüchekakat chi Maleiwakai püpüleerua süka pütüjaaïn saa'u sünaïn shiimüïn tü nümakat pümüïn. ⁴Talataleesia ma'i taa'in taapapa nachiki na tachooinkana, na takaaliijalakana sünaïn tü nanoulakat, sünaïn noonooïn waneepia sümaa tü shiimüinkat ekirajünakat anain naya, maa aka paa'inrüïn piaka'iya.

⁵Tawalachee, tatüjaa aa'uchi pia sünaïn kamaneein waneepia namüïn na wawalayuukana eekai nantapünaain pünainmüïn, mayaashiije nnojoliïn pi'raajüïn. ⁶Je nale'ejapa chajee na wawalayuukana

yaamüïn, naküjain püchiki sümüïn tü a'waajüsükalüürua Maleiwa yaaya sünaïn pii'iyatüïn namüïn sünaïn alin ma'i naya püpüla. Je nale'ejapeena pünainmüïn so'uweena wane ka'i sünaïn pi'iyouïn naya, tatüjaa aa'uchi pia sünaïn pükaaliijainjanain naya nachikua süpüla na'yataaïn nüümüïn Maleiwa. ⁷Sünaïn no'unüïn nepialu'ujee süpüla aküjaa nüchiki chi O'tte'erüikai, nnojoliishii achuntüïn sümüïn tü manoujainsatkalüürua tü kasa che'ojaakat namüïn süpüla o'unaa. ⁸Je sükajee tia, anashi müleka ayatüle pia sünaïn kamaneein namüïn na puwalayuu eekai nantapünaain pünainmüïn sünaïn a'yatawaa nüümüïn chi Senyotkai, süpüla wanaawajiraainjatüïn paa'in waneepia namaa sünaïn ekirajaa tü shiimüinkat.

⁹Tü taluwataakat anain sulu'u tü karaloukta tashajakat paala jümüïn jia a'waajüshiikana Maleiwa cha'aya, ayouktünüsü nütüma chi wayuu ja'akakai, Diótrefeskai anülia. Nnojoliishii jamajanain waya nüümüïn, süka nücheküïn sülateein nujut puulia sünaïn laülawaa jüpüleerua jia anoujashiikana jüpüshua. ¹⁰Je müleka to'unule

jünainmüin, taashajaweerü achiki jümaa tü naa'inrakat sünaïn niperulajüin waya sümaa ni'rülin wayumüin wamüin. Nnojotsü shiaïn ne'e sümüiwa tü kasa mojusü naa'inrakat. Mamaneesai nia namüin na wawalayuu aküjülüikana nüchiki chi O'tte'erüikai, na chapünaakana jünainmüin. Je na wayuukana ja'aka eekai kamaneein namüin na antakana jünainmüin, achiajaanüshii naya nütüma sümaa najütünüin nütüma sulu'ujee tü outkajaaleekat.

¹¹⁻¹²Taluwataaïn joolu'u pünainmüin wane wawala kanüliashi Demetrio. Kojutshi nia sütüma tü anoujasükalüirua sainküin mmakat süpüshua, sünaïn “Anashi ma'i nia süka nikirajüin waya waneepia sünaïn tü shiimüinkat” sünaïn maa nümüin. Akaajaa wanüiki wayakana yaaje'ewaliikana nüchikiya. Je pütüjaa aa'ulu sünaïn shiimüin süpüshua tü waküjakat pümüin.

Tawalachee, nnojo püshatüin tü kasa mojusü saa'inrakat tü wayuukolüirua eekai müin aka naa'in Diótréfes. Shia anaka alu'u müleka püshatüle tü kasa anasü saa'inrakat wayuu eekai müin aka naa'in Demetrio. Chi wayuu eekai naa'inrüin waneepia tü anasükat, nüchon Maleiwa nia. Otta chi eekai naa'inrüin waneepia tü mojusükat, nnojoiishi ni'raajüin Maleiwa süka nnojolin nüchoin.

¹³Kettaasü tü tashajüinjatkat joolu'u pümüin sulu'u tü karalouktakat, ja'itairü isain wainma tü tashajeekat pümüin. ¹⁴Kasataalejese tountüin to'unüin pünainmüin maalü süpüla taashajaainjachin pümaa pümülatu'u.

¹⁵Tachuntüin joolu'u nümüin Maleiwa paa'u süpüla naapüinjachin wane anaa pümüin. Asakitshii pünain na puwalayuukana yaaya. “Asakitshii jünain”, pümawalai namüin na wawalayuukana cha'aya wane'ewaire nakua.